

Tahap kecekapan penjawat awam, tenaga kerja negara perlu ditingkat

Usaha pastikan pelan dan dasar kerajaan dapat dilaksana dengan baik, menyeluruh

Oleh Mohd Nasaruddin Parzi
bhnews@bh.com.my

Kuala Lumpur: Tahap kecekapan penjawat awam dan tenaga kerja negara perlu ditingkatkan seiring kemunculan bidang baharu yang memerlukan kemahiran tahap tinggi, kata Datuk Seri Anwar Ibrahim.

Perdana Menteri berkata, kecekapan itu diperlukan bagi membolehkan pelan dan dasar yang sedang dijayakan kerajaan bukan saja menarik dan memukau, sebaliknya pelaksanaannya kelak dilaksana dengan baik dan menyeluruh.

“Soal industri kenderaan elektrik (EV) dan transisi tenaga, ini tak jadi perkiraan dalam pelan dulu, tetapi sekarang ditekankan sebagai pertambahan (bidang tumpuan baharu). Negara dan badan antarabangsa juga beri penekanan sama.”

“Sebab itu, tahap kecekapan pegawai mesti ditingkatkan. Jika tidak, pelan nampak menarik dan memukau, tetapi pelaksanaan itu tidak menampakkan keelakan daripada dulu. Sebab itu



Anwar mendengar penerangan daripada Kamarulzaman mengenai buku Pelan Struktur Kuala Lumpur 2040 pada Majlis Peluncuran Pelan Struktur Kuala Lumpur 2040 di Kuala Lumpur semalam. Turut kelihatan Dr Wan Azizah dan Fahmi (kiri).
(FOTOBERNAMA)

saya tekankan kepada Datuk Bandar (Kuala Lumpur) dan rakan supaya gigih dan bersungguh-sungguh dalam tekad kita memastikan dasar ini dilaksana dengan baik,” katanya berucap melancarkan Pelan Struktur Kuala Lumpur 2040, di sini semalam.

Yang turut hadir, Menteri Komunikasi dan Digital, Fahmi Fadzil; Datuk Bandar Kuala Lumpur, Datuk Kamarulzaman Mat Salleh serta Ahli Parlimen Bandar Tun Razak, Datuk Seri Dr Wan Azizah Wan Ismail.

Anwar berkata, pelaburan besar yang diterima negara, terutama dalam bidang automotif menerusi syarikat Geely, mengingatkan semua pihak akan keperluan mendesak untuk negara

memberi latihan tambahan dari segi tenaga kejuruteraan dan teknikal.

“Jadi saya cadangkan dan mereka setuju untuk peringkat awal ini, kita mengirim 300 jurutera kelulusan TVET (Program Pendidikan dan Latihan Teknikal dan Vokasional (TVET)) ke China untuk dapatkan kepakaran tambahan untuk bertugas di Tanjung Malim.

“Infinion, syarikat Jerman yang setuju menambah pelaburan RM25 bilion di Malaysia juga menuntut kecekapan dan kemahiran yang lebih daripada kursus biasa (di universiti). Sebab itu umpamanya, saya usulkan kepada Kementerian Pendidikan Tinggi (KPT) untuk kita adakan Fakulti Kecerdasan Buatan (AI)

pertama yang akan dibangunkan di UTM (Universiti Teknologi Malaysia),” katanya.

Tidak lengahkan projek

Anwar yang juga Menteri Kewangan mengingatkan Dewan Bandaraya Kuala Lumpur (DBKL) tidak melengahkan projek pembangunan yang diluluskan.

Katanya, tindakan melengahkan projek sedemikian memberi kesan dan kesukaran, apatah lagi jika ia membabitkan kepentingan pelabur dan masyarakat.

“Sebab itu kita putuskan tadi (semalam), selepas dua minggu, laporan mesti sampai untuk dibentangkan (status) pelaksanaan (projek pembangunan) yang sudah diputuskan. Kalau tidak, nanti pihak pengurusan tangguh

sampai tahun depan kerana katanya Disember ini bulan yang separuhnyanya adalah cuti. Cuti-cuti juga, tetapi dalam Disember itu mesti ada laporan berkala,” katanya.

Menyentuh Pelan Struktur Kuala Lumpur 2040 yang dilancarkan semalam, Anwar berkata, ia memerlukan tekad dan kesungguhan warga DBKL untuk dijayakan biarpun akui berdepan beberapa cabaran.

“Pelan ini, cabarannya adalah pelaksanaannya. Kita tak perlu tunggu pelan untuk melaksanakan. Saya lihat tadi projek perumahan baharu, sementara kita bagi ruang kepada orang yang mampu untuk meneruskan dengan projek megah, mewah tetapi ada kesediaan dan tekad dari kalangan pengurusan DBKL menekankan aspek yang kita sebut dalam inti sari pelan struktur ini.

“Sementara kita merangka pelan ini, pelaksanaannya itu penting. Saya dapat saksikan dalam mesyuarat dua jam tadi bagaimana penekanan ini. Cabaran kedua kita adalah kecepatan dan kepantasan untuk meluluskan. Sebelum itu dimulakan dengan rundingan dan teliti.

“Seperti biasa, ada masalah sekiranya kita lewat meluluskan. Ada pandangan saya rasa munasabah bukan saja di Kuala Lumpur tetapi tempat lain yang disebut *The Ease of Doing Business* (EoDB). Kepantasan dan kecekapan selepas mengambil kira semua peraturan yang diteliti,” katanya.